

**KOMISIJA ZA IZBOR JEDNOG/E NASTAVNIKA/ICE U ZVANJE VANREDNOG/E PROFESORA NA NAUČNOJ OBLASTI PRAVNA HISTORIJA:**

- Dr. Zdravko Lučić, redovni profesor na Univerzitetu u Sarajevu – Pravnom fakultetu na naučnoj oblasti Rimsko pravo, predsjednik i član;
- Dr. Enes Durmišević, profesor emeritus Univerziteta u Sarajevu na naučnoj oblasti Pravna historija, član;
- Dr. Željko Bartulović, redovni profesor na Pravnom fakultetu Univerziteta u Rijeci na naučnoj oblasti Povijest prava i države, član.

**UNIVERZITET U SARAJEVU - PRAVNI FAKULTET
NASTAVNO-NAUČNOM VIJEĆU PRAVNOG FAKULTETA**

- ovdje

**UNIVERZITET U SARAJEVU
PRAVNI FAKULTET**Broj: 01-766/23
Datum; 27.4. 2023 god.

Sarajevo, 24. aprila 2023. godine

PREDMET:**Izveštaj sa prijedlogom za izbor u akademsko zvanje
vanrednog profesora na naučnoj oblasti Pravna historija****I. Podaci o objavljenom konkursu i formiranju Komisije**

Na osnovu člana 121. Zakona o visokom obrazovanju Kantona Sarajevo („Službene novine Kantona Sarajevo“, broj: 36/22 – u daljem tekstu i ZVO), člana 201. Statuta Univerziteta u Sarajevu, br. 01-1093-3-1/18 od 28.11.2018. godine (u daljem tekstu Statuta), te Odluke Senata Univerziteta o davanju saglasnosti na raspisivanje konkursa, br. 01-5-77/23 od 22.2.2023. godine, Univerzitet u Sarajevu - Pravni fakultet raspisao je konkurs za izbor u akademsko zvanje **vanredni/a profesor/ica na naučnoj oblasti Pravna historija** - 1 izvršilac, puno radno vrijeme (redni broj 2. Dinamičkog plana potreba za raspisivanje konkursa za izbor u studijskoj 2022/23 godini koji je usvojen Odlukom br. 01-1659/22 od 14.9.2022. godine).

Konkurs je objavljen 6. marta 2023. na službenoj internet stranici Pravnog fakulteta (www.pfsa.unsa.ba), službenoj internet stranici Univerziteta u Sarajevu (www.unsa.ba) te u dnevnom listu „Dnevni avaz“.

Na osnovu člana 123. ZVO i člana 205. stav 1. Statuta Univerziteta u Sarajevu, Nastavno-naučno vijeće Pravnog fakulteta Univerziteta u Sarajevu je, na XLII. sjednici održanoj dana 05.04.2023. godini u 11,00 sati donijelo **Odluku o imenovanju Komisije za izbor jednog/e**



nastavnika/ice u zvanje vanrednog/e profesora/ice na naučnoj oblasti Pravna historija, u sastavu:

1. Dr. Zdravko Lučić, redovni profesor na Univerzitetu u Sarajevu – Pravnom fakultetu na naučnoj oblasti Rimsko pravo, predsjednik i član;
2. Dr. Enes Durmišević, profesor emeritus Univerziteta u Sarajevu na naučnoj oblasti Pravna historija, član;
3. Dr. Željko Bartulović, redovni profesor na Pravnom fakultetu Univerziteta u Rijeci na naučnoj oblasti Povijest prava i države, član.

Navedenom Odlukom je utvrđeno da je zadatak Komisije da u roku od 30 dana od imenovanja Nastavno-naučnom vijeću Pravnog fakulteta podnese pisani Izvještaj sa prijedlogom za izbor u akademsko zvanje.

Komisija je **zaprimila jednu (1) prijavu za izbor u akademsko zvanje vanrednog/e profesora/ice na naučnoj oblasti Pravna historija**. Stručna služba je u pisanoj formi potvrdila da je prijava blagovremeno i uredno podnesena.

Navedenu prijavu podnio je dr. sc. Mehmed Bečić, docent Pravnog fakulteta Univerziteta u Sarajevu na naučnoj oblasti Pravna historija.

Uz prijavu, kandidat je podnio i sljedeću dokumentaciju:

1. Tekst konkursa (isпис sa Internet stranice Univerziteta u Sarajevu),
2. Izvod iz matične knjige rođenih (original),
3. Uvjerenje o državljanstvu (original),
4. Obavještenje o prebivalištu (ovjerena kopija),
5. Potvrdu o zaposlenju (ovjerena kopija),
6. Diplomu doktora pravnih nauka (ovjerena kopija),
7. Dodatak diplomi doktora pravnih nauka (ovjerena kopija),
8. Diplomu magistra pravnih nauka (ovjerena kopija),
9. Uvjerenje o položenim ispitima i uspjehu na magistarskom studiju (ovjerena kopija),
10. Diplomu diplomiranog pravnika (ovjerena kopija),
11. Uvjerenje o položenim ispitima i uspjehu na diplomskom studiju (ovjerena kopija),
12. Uvjerenje da nisam osuđivan za krivična djela (ovjerena kopija),
13. Uvjerenje o nevođenju krivičnog postupka (ovjerena kopija),
14. Biografiju (svojeručno potpisanu),
15. Listu publikacija sa relevantnim informacijama za izbor u akademsko zvanje (svojeručno potpisanu),
16. Kopije objavljenih radova (ukupno 22 rada),
17. Knjigu „Između Orijenta i Okcidenta: Recepcija Općeg građanskog zakonika u Bosni i Hercegovini“,
18. Dvije recenzije knjige „Između Orijenta i Okcidenta: Recepcija Općeg građanskog zakonika u Bosni i Hercegovini“,
19. Potvrdu o mentorstvima i članstvu u komisijama na II i III ciklusu studija (original),

20. Dokazi o autorstvu/realizaciji projekta „Pravna sudbina sarajevskih vakufa“ te organizaciji i učešću na naučnim skupovima povezanih sa projektom: Izvještaj sa naučnih skupova, program i objavljene vijesti o projektu (priložene su kopije, uz naznaku da su originali dokumenata su u arhivi Pravnog fakulteta Univerziteta, kopije dva rada o vakufima u listi publikacija),
21. Dokazi o autorstvu/realizaciji projekta „Legal essentials“: Memoranduma o saradnji Pravnog fakulteta i Akademije likovnih umjetnosti (priložene su kopije, uz naznaku da su originali u arhivi Pravnog fakulteta), objavljene vijesti o projektu i internet adrese-poveznice/linkovi za pristup video prilogima - rezultatima projekta,
22. Dokazi o autorstvu/realizaciji projekta „Zemaljski kontinuitet: Digitalna zbirka državnopravnih dokumenata BiH“ – Ugovor sa Vladom Kantona Sarajevo (kopija, uz napomenu da se dokument nalazi u arhivi Pravnog fakulteta Univerziteta u Sarajevu, vidi i izvještaje iz arhive) i internet adresa-poveznica/linkovi za pristup rezultatu projekta,
23. Dokazi o učešću u međunarodnom naučno-istraživačkom projektu Commercial Law in Southeastern Europe i naučnim skupovima u okviru projekta: potvrda voditelja projekta (ispis pdf dokumenta), kopija rada u listi publikacija, kopija izvještaja usvojenog na NNV-u Pravnog fakulteta (original u arhivi Pravnog fakulteta),
24. Dokazi o učešću u međunarodnom naučno-istraživačkom projektu „Kaufrecht in Mitteleuropa – Entstehung und Wirkungsgeschichte der Art 337-359 ADHGB“ i skupovima u okviru projekta: potvrda voditelja projekta (ispis pdf dokumenta), kopija izvještaja usvojenog na NNV-u Pravnog fakulteta (uz napomenu da se original se nalazi u arhivi Pravnog fakulteta), program jedne naučne konferencije u okviru projekta,
25. Dokazi o učešću u međunarodnom naučno-istraživačkom projektu Max Planck instituta za evropsku pravnu historiju u Frankfurtu koji je rezultirao publikacijom „Konflikt und Koexistenz: Die Rechtsordnungen Süd-Ost Europas im XIX und XX Jahrhundert“ (separat objavljenog rada i objava sa službene Internet stranice Max Planck instituta),
26. Dokaz o učešću u naučno-istraživačkom projektu Instituta za historiju Univerziteta u Sarajevu (original),
27. Dokaz o organizaciji i učešću na Panel diskusiji o digitalizaciji i pravu: izvještaj usvojen na NNV-u (kopija, uz napomenu da se original nalazi u arhivi Pravnog fakulteta) program i objavljene vijesti,
28. Dokaz o nastavničkim sposobnostima – rezultati evaluacije/anonimne ankete (ispis e-mail korespondencije i excel dokumenta, uz napomenu da se originali nalaze u arhivi Pravnog fakulteta Univerziteta u Sarajevu),
29. Dokazi o recenziranju radova za domaće i međunarodne časopise (ispis e-mailova),
30. Dokaz o dodijeljenoj (neiskorištenoj) istraživačkoj post-doc stipendiji Max Planck instituta u Frankfurtu (ispis pdf dokumenta, uz napomenu da se original po potrebi daje na uvid),
31. Dokaz o stipendiji Austrijske agencije za razmjenu – „OeAD“ (ispis pdf dokumenta, uz napomenu da se original po potrebi daje na uvid),
32. Dokaz o post-doc stipendiji „Go-Styria“ (ispis pdf dokumenta, uz napomenu da se original po potrebi na uvid),
33. Certifikat o završenom programu cjeloživotnog učenja „TRAIN“ (ovjerena kopija),
34. Certifikat C1 „Goethe“ o poznavanju njemačkog jezika (ovjerena kopija),



35. Diplomu za postignut odličan uspjeh na studiju (ovjerena kopija),
36. Odluka o dodjeli nagrade Univerziteta u Sarajevu „Edhem Ćamo“ (ovjerena kopija),
37. Dokaz o stipendiji Fondacije Konrad Adenauer (ovjerena kopija),
38. Certifikat Evropske akademije Oetzenhausen (kopija, uz napomenu da se original daje po potrebi na uvid),
39. Certifikat Europa Instituta (kopija, uz napomenu da se original dostavlja po potrebi na uvid),
40. Certifikat o učešću na konferenciji „Bosanskohercegovačke pravne tradicije (...)“ (kopija, uz napomenu da se original dostavlja po potrebi na uvid),
41. Certifikat o učešću na međunarodnom simpoziju Pravne akademije Turske (kopija, uz napomenu da se original dostavlja po potrebi na uvid),
42. Uvjerenje o učešću u pravnoj klinici iz obligacionog prava (ovjerena kopija),
43. Uvjerenje o učešću u pravnoj klinici iz građanskog prava (ovjerena kopija),
44. Zahvalnica Udruženja studenata Pravnog fakulteta (kopija, uz napomenu da se original dostavlja po potrebi na uvid),
45. Zahvalnica Studentskog parlamenta Univerziteta u Sarajevu (kopija, uz napomenu da se original dostavlja po potrebi na uvid),
46. Certifikat „Project Harmony“ (kopija, uz napomenu da se original dostavlja po potrebi na uvid),
47. Certifikat američkog State Department-a (kopija, uz napomenu da se original dostavlja po potrebi na uvid),
48. Diploma o završenoj gimnaziji (kopija, uz napomenu da se original dostavlja po potrebi na uvid),
49. CD sa prijavom, biografija i relevantni dokumenti za izbor (origininali pdf dokumenata, e-mailova i dr.).

Nakon što je razmotrila podnesenu prijavu i priloženu dokumentaciju prijavljenog kandidata,
Komisija podnosi sljedeći

I Z V J E Š T A J

1. Uslovi za izbor u akademsko zvanje vanredni profesor na Univerzitetu u Sarajevu

Članom 112, stav 2, pod e) ZVO propisani su sljedeći uslovi za izbor u akademsko zvanje vanredni profesor:

1. proveden najmanje jedan izborni period u zvanju docenta,
2. minimalno pet naučnih radova objavljenih u priznatim publikacijama nakon izbora u zvanje docenta, od čega su dva naučna rada objavljena u publikacijama indeksiranim u relevantnim naučnim bazama,
3. objavljena knjiga,
4. originalni stručni uspjeh kao što je projekat, patent ili originalni metoda te
5. uspješno mentorstvo najmanje dva kandidata za stepen drugog ciklusa studija/integriranog studija odnosno ekvivalenta.



Pored toga, u članu 112, stav 3 ZVO propisano je da će Statutom i općim aktom, a u skladu sa Smjernicama iz člana 116, visokoškolska ustanova utvrditi posebno vrednovanje za dodatne oblast prilikom izbora u akademska zvanja i to: nastavničke sposobnosti i doprinos, doprinos procesu internacionalizacije i društveni doprinos.

Komisija konstatira da Smjernice propisane ZVO i novi statut usklađen sa navedenim Smjernicama i ZVO, do raspisivanja predmetnog konkursa i do podnošenja ovog izvještaja, nisu doneseni/usvojeni. U skladu s tim, Komisija smatra da se uslovi za izbor u akademsko zvanje procjenjuju u odnosu na član 112, stav 2, pod e) ZVO.

Osim navedenih zakonskih odredbi, Komisija smatra da je prilikom razmatranja prijave, u konkretnom slučaju, obavezna primijeniti i član 176 ZVO, u kojem je propisano da svi članovi akademskog osoblja, koji su izabrani u akademsko zvanje prema odredbama zakona koji je prestao važiti stupanjem na snagu ZVO **zadržavaju pravo da budu izabrani u isto ili više akademsko zvanje prema uslovima propisanim ranijim zakonom**. Imajući to u vidu, Komisija konstatira da je prilikom razmatranja prijave kandidata dr. sc. Mehmeda Bečića obavezna da uslove za izbor u akademsko zvanje vanrednog profesora cijeni u skladu sa članom 96, pod e) Zakona o visokom obrazovanju Kantona Sarajevo („Službene novine Kantona Sarajevo“, br.: 33/17, 35/20, 40/20 i 39/21 – u daljem tekstu i ZVO/17), ukoliko su navedeni zakonski uslovi povoljniji za kandidata od uslova propisanih važećim zakonom tj. ZVO. Uslovi za izbor u akademsko zvanje vanredni profesor, propisani članom 96, pod e) ZVO/17 su:

1. proveden najmanje jedan izborni period u zvanju docenta,
2. najmanje pet naučnih radova objavljenih u priznatim publikacijama koje se nalaze u relevantnim naučnim bazama podataka,
3. objavljena knjiga,
4. originalni stručni uspjeh kao što je projekt, patent ili originalni metoda te
5. uspješno mentorstvo najmanje jednog kandidata za stepen drugog ciklusa studija, odnosno integriranog ciklusa studija.

2. Pregled osnovnih biografskih podataka prijavljenog kandidata

2.1. Podaci o formalnom obrazovanju

Dr. sc. Mehmed Bečić rođen je 23. decembra 1985. godine u Brčkom (Bosna i Hercegovina). U Brčkom je stekao osnovno i srednjoškolsko obrazovanje. Osnovnu školu je završio 2000. godine, a gimnaziju 2004. godine sa odličnim uspjehom.

Kandidat je 2009. godine završio univerzitetski – **diplomski studij prava sa prosječnom ocjenom 9,25** i tako stekao zvanje diplomiranog pravnika. Nakon završenog diplomskog studija, pohađao je postdiplomski/magistarski studij na Katedri za pravnu historiju i komparativno pravo. **Magistarski studij završio je sa prosječnom ocjenom 10,00**, a magistarski rad pod naslovom *Primjena Općeg građanskog zakonika u praksi Vrhovnog suda za Bosnu i Hercegovinu za vrijeme austrougarske uprave* odbranio je sa odlikom 24. aprila

2013. godine i tako stekao zvanje **magistra pravnih nauka**. Nakon završenog postdiplomskog studija, kandidat je upisao i treći ciklus studija (doktorski studij) na Pravnom fakultetu Univerziteta u Sarajevu (Pravno-historijski i komparativno pravni smjer). Odbranom doktorske disertacije pod naslovom *Pravni transplanti i pravni pluralizam: transformacija stvarnog prava u Bosni i Hercegovini 1878-1918*. 27. aprila 2018. godine stekao je zvanje **doktora pravnih nauka**, a tokom studija je ostvario **prosjeck ocjena 10,00**.

2.2. Podaci o drugim oblicima obrazovanja

Pored formalnog obrazovanja, kandidat je pohađao razne druge oblike cjeloživotnog obrazovanja, od kojih se izdvajaju:

- „TRAIN“ (Training & Research for Academic Newcomers) program cjeloživotnog učenja u oblasti pedagoškog obrazovanja i jačanja kompetencija akademskog osoblja Univerziteta u Sarajevu – program koji služi kao dokaz o minimumu pedagoškog obrazovanja i koji se vrednuje sa ukupno 6 ECTS bodova;
- Seminar/obuka: Current challenges of European Integration – civic participation in best practice (Trenutni izazovi evropskih integracija – dobre prakse učešća građana) u organizaciji „ASKO Europa“ fondacije i Evropske akademije Otzenhausen;
- Akademija o podučavanju i istraživanju prava EU „SEE Graduates EU Law Teaching and Research Academy“ održana na Evropa institutu Saarland Univerziteta;
- Obuka za asistenta Fondacije Konrad Adenauer;
- Obuka u okviru „Project Harmony“ – programa za mlade lidere – srednjoškolskog uzrasta (program Vlade SAD-a, održan u Bostonu Vermontu, SAD).

2.3. Podaci o radnom iskustvu i drugim radnim angažmanima

Kandidat je od 2009. godine zaposlen na Pravnom fakultetu Univerziteta u Sarajevu. Do podnošenja prijave (2023.) godine stekao je radno i akademsko iskustvo u tri akademska zvanja na naučnoj oblasti Pravna historija:

- **od 2009. do 2013. u zvanju asistenta** (na grupi predmeta Historija države i prava Bosne i Hercegovine);
- **od 2013. do 2018. u zvanju višeg asistenta**
- **od 2018. do 2023. u zvanju docenta**

Pored radnog iskustva na Univerzitetu, kandidat je imao razne druge radne, akademske, stručne i društvene angažmane, od čega se izdvajaju:

- Konsultantski angažman za digitalnu imovine (nezamjenjivi tokeni - NFT) na projektu UN Women ureda u BiH;
- Recenzenije za domaće i inostrane naučne i stručne časopise: Journal of Islamic law (Harvard Law School), Pravna misao, Sineza i dr.
- Članstvo u Redakciji Godišnjaka Pravnog fakulteta u Sarajevu
- Angažman/članstvo u Komisiji za izradu Prednacrt zakona o visokom obrazovanju Kantona Sarajevo
- Supervizor Ureda za borbu protiv korupcije i osiguranje kvaliteta KS
- Član ad hoc radne grupe za izradu Strategije za borbu protiv korupcije 2020-2024.



- Suosnivač udruženja „Centar za pravne kulture“
- Suosnivač udruženja "Centar za primijenjeno znanje" (udruženje prestalo sa radom)

2.4. Stručno i naučno usavršavanje u inostranstvu

Tokom svog dosadašnjeg akademskog rada, kandidat je obavio više istraživačkih boravaka na naučnim institucijama izvan Bosne i Hercegovine, i to na:

- Karl-Franzes Univerzitetu u Gracu – Pravni fakultet (2019.)
- Univerzitetu u Beču – Pravni fakultet (mart-juni 2016.)
- Univerzitetu Saarland - Europa Institut (juli 2013. u sklopu gore spomenute obuke)
- Pravnom fakultetu, Freie Univerziteta u Berlinu (januar 2010.)

2.5. Stipendije, nagrade i priznanja

Kandidat je dobio sljedeće stipendije, nagrade i priznanja:

- Postdoktorska stipendija Max Planck instituta za evropsku pravnu historiju sa sjedištem u Frankfurt na Majni (Njemačka) za istraživanje na temu „Transformation of internal legal culture and application of foreign legal transplants in Ottoman and Post-Ottoman Bosnia“ (stipendija je dodijeljena za period septembar-novembar 2020, ali je ostala neiskorištena zbog izbijanja pandemije Covid-virusa);
- Postdoktorska stipendija Vlade Štajerske „Go-Styria“ za istraživanje na Institutu za korporativno i međunarodno trgovačko pravo Karl Franzes Univerziteta u Gracu - Austrija (2019.)
- Stipendija Austrijske agencije za razmjenu - "OeAD" radi istraživanja i izrade doktorske disertacije na Institutu za pravnu i ustavnu historiju na Pravnom fakultetu Univerziteta u Beču (ljetni semestar 2016.)
- Nagrada Univerziteta u Sarajevu "Akademik dr. Edhem Ćamo" za naučno-istraživački rad (2008.)
- Stipendija Fondacije Konrad Adenauer (akademska 2006/07. godina)
- Nagrada Pravnog fakulteta Univerziteta u Sarajevu za izvanredne studentske rezultate (2006.)

2.6. Objavljeni radovi, mentorstva, projekti, seminari i konferencije

Kandidat dr. sc. Mehmed Bečić objavio je jednu monografiju, 20 naučnih radova, jedan (1) istraživački esej i dva (2) prikaza.

Pored toga, kandidat je bio autor četiri (4) naučna/stručna projekta te učesnik na četiri (4) naučna projekta, od kojih su tri (3) međunarodnog karaktera (rezultat međunarodne naučne saradnje). Kandidat je bio idejni autor, organizator i učesnik pet (5) javnih manifestacija u formi naučnih konferencija, panel diskusija, skupova i seminara te učesnik na ukupno 17 takvih događaja, od kojih je većina rezultat međunarodne naučne saradnje.

Kandidat je bio mentor za šest (6) uspješno odbranih završnih radova na drugom ciklusu (master) studiju te bio član deset (10) komisija za ocjenu i odbranu završnih radova na master studiju (broj se odnosi na realizirane odbrane završnih radova) i član dvije (2) komisije za ocjenu i odbranu doktorske disertacije (broj se odnosi na realizirane odbrane doktorskih disertacija).



U nastavku izvještaja, Komisija detaljnije razmatra, obrazlaže i procjenjuje elemente iz biografije i bibliografije kandidata, koji su relevantni za izbor u akademsko zvanje vanrednog profesora.

3. Naučno-istraživački rad: objavljeni radovi kandidata

3.1. Radovi objavljeni do izbora u akademsko zvanje docent

Komisija konstatira je kandidat do posljednjeg izbora u akademsko zvanje (akademsko zvanje docenta) objavio ukupno **11 naučnih radova i 2 prikaza**. Većina radova (ukupno 10) objavljena je u publikacijama indeksiranim u **relevantnim naučnim bazama**, a jedan od tih radova objavljen je u publikaciji jedne od najprestižnijih naučnih institucija za pravnu historiju u Evropi (Max Planck institut za evropsku pravnu historiju u Frankfurtu).

Objavljeni radovi kandidata dr. sc. Mehmed Bečića, do izbora u akademsko zvanje docent su:

1. Mehmed Bečić, „**Das Privatrecht in Bosnien-Herzegowina (1878-1918): Zur Koexistenz österreichischer und ottomanischer Rechtsinstitutionen**“, in: Thomas Simon (Hg.), *Konflikt und Koexistenz. Die Rechtsordnungen Südosteuropas im 19. und 20. Jahrhundert, Band II, Serbien, Bosnien-Herzegowina, Albanien*, Vittorio Klostermann, 2017., 71-137.

Napomena:

- Publikacija predstavlja izdanje Max Planck instituta za evropsku pravnu historiju
- Publikacija je indeksirana u bazi ProQuest

2. Mehmed Bečić, „**Novi pogled na transformaciju šerijatskih sudova u Bosni i Hercegovini: da li je 1883. godine nametnut kolonijalni model primjene šerijatskog prava?**“, *Godišnjak Pravnog fakulteta u Sarajevu*, 2017., 59-82.

Napomena:

- Godišnjak Pravnog fakulteta u Sarajevu indeksira se u međunarodnim referentnim bazama CSA Sociological Abstracts (Proquest), CSA Worldwide Political Science Abstracts (Proquest), a puni tekst je uključen u Central and East European Academic Source (EBSCOhost) i Law Journal Library (HeinOnline).

3. Mehmed Bečić, „**Analiza sistema visokog obrazovanja u Bosni i Hercegovini**“, *Sveske za javno pravo*, 29, 2017, 3-16.

Napomena:

- Publikacija je indeksirana u CEEOL – Central and Eastern European Online Library

4. Mehmed Bečić, „**Da li je millet sistem ostavio trag na sudstvo u postosmanskoj Bosni i Hercegovini?**“, u: *Zbornik radova sa naučnog skupa Historija države i prava BiH: izazovi i perspektive, Povodom 50 godina naučnog i publicističkog rada prof. dr.*



Mustafe Imamovića, JU Zavod za zaštitu i korištenje kulturno-historijskog i prirodnog naslijeđa Tuzlanskog kantona, Tuzla, 2017., 35-42.

5. Mehmed Bečić, „**Recepcija krivičnog prava u Bosni i Hercegovini u drugoj polovini XIX stoljeća**“, Godišnjak Pravnog fakulteta u Sarajevu, LIX-2016, 219-244.
Napomena:
 - Godišnjak Pravnog fakulteta u Sarajevu indeksira se u međunarodnim referentnim bazama CSA Sociological Abstracts (Proquest), CSA Worldwide Political Science Abstracts (Proquest), a puni tekst je uključen u Central and East European Academic Source (EBSCOhost) i Law Journal Library (HeinOnline)
6. Mehmed Bečić, „**Austrougarska reforma pravosuđa i građanskog postupka u Bosni i Hercegovini**“, Godišnjak Pravnog fakulteta u Sarajevu, LVIII-2015, 2015, 107-124.
Napomena:
 - Godišnjak Pravnog fakulteta u Sarajevu indeksira se u međunarodnim referentnim bazama CSA Sociological Abstracts (Proquest), CSA Worldwide Political Science Abstracts (Proquest), a puni tekst je uključen u Central and East European Academic Source (EBSCOhost) i Law Journal Library (HeinOnline)
7. Mehmed Bečić, „**Primjena Medželle u postosmanskoj Bosni i Hercegovini**“, Godišnjak Pravnog fakulteta u Sarajevu, LVII-2014, 51-66.
Napomena:
 - Godišnjak Pravnog fakulteta u Sarajevu indeksira se u međunarodnim referentnim bazama CSA Sociological Abstracts (Proquest), CSA Worldwide Political Science Abstracts (Proquest), a puni tekst je uključen u Central and East European Academic Source (EBSCOhost) i Law Journal Library (HeinOnline)
8. Mehmed Bečić, „**Osmansko tanzimatsko pravo i austrougarski pravni poredak u Bosni i Hercegovini**“, Anali Pravnog fakulteta u Zenici, Broj 12, Godina 6, Zenica, 2013, 187-201.
Napomena:
 - Publikacija je indeksirana u Law Journal Library (HeinOnline), Erih+, EBSCOhost i CEEOL
9. Mehmed Bečić, „**Historijska i pravna osnovanost primjene Općeg građanskog zakonika u Bosni i Hercegovini nakon okupacije 1878. godine**“, Godišnjak Pravnog fakulteta u Sarajevu, LIV-2011, 63-79.
Napomena:
 - Godišnjak Pravnog fakulteta u Sarajevu indeksira se u međunarodnim referentnim bazama CSA Sociological Abstracts (Proquest), CSA Worldwide Political Science Abstracts (Proquest), a puni tekst je uključen u Central and East European Academic Source (EBSCOhost) i Law Journal Library (HeinOnline)



10. Mehmed Bečić, „Ustavnopravni položaj Bosanskog sabora prema Ustavu iz 1910. godine“, Ljudska prava – Časopis za sve pravno-političke probleme, Broj 1-4, Godina 9, 2008, 61-71.

Napomena:

- Rad je objavljen u vrijeme dok je kandidat bio student diplomskog studija prava.

11. Mehmed Bečić; Nermin Keranović, „Evropski sud za ljudska prava“, Ljudska prava – Časopis za sve pravno-političke probleme, Broj 1-4, Godina 8, 2007, 185-206.

Napomena:

- Rad je objavljen u vrijeme dok je kandidat bio student diplomskog studija prava.

12. Mehmed Bečić, „Kontinuitet pravne misli u Bosni“, Pregled – časopis za društvena pitanja, Broj 2, Godina 2015, Godište LVI, Sarajevo, maj-august 2015, 109-114. (PRIKAZ)

Napomena:

- Publikacija je indeksirana u bazama EBSCOhost, Indeks Copernicus International i Road

13. Mehmed Bečić, „Međunarodna naučna konferencija 200 godina Općeg građanskog zakonika“, Godišnjak Pravnog fakulteta u Sarajevu, LIV-2011, Pravni fakultet Univerziteta u Sarajevu Sarajevo, 2011, 413-414. (PRIKAZ)

Napomena:

- Godišnjak Pravnog fakulteta u Sarajevu indeksira se u međunarodnim referentnim bazama CSA Sociological Abstracts (Proquest), CSA Worldwide Political Science Abstracts (Proquest), a puni tekst je uključen u Central and East European Academic Source (EBSCOhost) i Law Journal Library (HeinOnline).

3.2. Radovi objavljeni nakon izbora u akademsko zvanje docent

3.2.1. Knjige

Kandidat je objavio jednu knjigu:

- Mehmed Bečić, *Između Orijenta i Okcidenta: Recepcija Općeg građanskog zakonika u Bosni i Hercegovini*, Univerzitet u Sarajevu – Pravni fakultet, Sarajevo, 2022.
- Informacije u cobiss sistemu: <https://plus.cobiss.net/cobiss/bh/bs/bib/52360966>

Radi se o monografiji u kojoj je autor predstavio rezultate svojih postdiplomskih (magistarskih), doktorskih i postdoktorskih istraživanja na temu recepcije Općeg građanskog zakonika u Bosni i Hercegovini. Komisija konstatira ova knjiga predstavlja pravno-historijsku studiju, u koju su uključene metode i literature komparativnog prava, teorije prava i građanskog prava.

Monografija predstavlja univerzitetsko izdanje (Univerziteta u Sarajevu – Pravnog fakulteta) i od akademske 2022/23. godini uvrštena je u obaveznu i dopunsku literaturu za spremanje ispita



iz predmeta Historija prava Bosne i Hercegovine na prvom ciklusu studija Pravnog fakulteta Univerziteta u Sarajevu i na predmetu Recepcija prava u jugoistočnoj Evropi na Komparativno-pravnom smjeru drugog ciklusa studija Pravnog fakulteta Univerziteta u Sarajevu.

S obzirom da je kandidat podnio i recenzije za navedenu monografiju, Komisija citira dijelove iz navedenih recenzija:

Iz recenzije br. 1 (recenzentica prof. dr Meliha Povlakić):

„U ovoj monografiji autor nastavlja i sistematizira svoja istraživanja koja je započeo u svojim različitim radovima, gdje im dodaje novu dodatnu vrijednost a to je doktrinarno objašnjenje fenomena recepcije na konkretnom primjeru recepcije OGZ-a.

Tekst koji se recenzira napisan je na 249 stranica koje uključuje Predgovor, Sadržaj, Uvodne napomene, Zaključak, spisak korištenih izvora, spisak korištene literature i nekoliko priloga (fotografije i kopije određenih dokumenata). U tekstu je navedeno 947 fus-nota.

Posebnu pažnju zaslužuje impresivna lista korištene literature. Kada su u pitanju monografije, članci, magistarske ili doktorske teze, autor je koristio 185 bibliografskih jedinica, na domaćim jezicima, te na engleskom i njemačkom jeziku. Korišteni radovi su objavljeni od Japana do SAD, Turske do Njemačke. Radi se o recentno objavljenim radovima, jer je tema očigledno vrlo zanimljiva u naučnoj zajednici, ali i o radovima starijeg datuma, što je logično budući da je rad prije svega rad jednog pravnog historičara koji istražuje proces koji traje duže od jednog stoljeća. Autor je uložio izuzetan trud da uključi što je veći broj relevantnih radova na komparativnoj razini i u historijskoj dimenziji.

U pogledu korištenih izvora treba pomenuti i arhivsku građu. Autor je istraživao neobjavljenu arhivsku građu Arhiva BiH, Arhiva Zemaljske vlade za BiH, Arhiva Vrhovnog suda za BiH. Takođe i arhive u Austriji: Austrijski državni arhiv u Beču (Österreichisches Staatsarchiv - OeStA), Opći arhiv uprave (Allgemeiner Verwaltungsarchiv - AVA). Istražio je propise i sudsku praksu iz perioda Austrougarske vladavine u BiH (Zbornici zakona i naredbi, Zbirke normi za pravosuđe (litografirani rukopisi), štampane zbirke propisa iz tog erioda kao i zbirke sudskih odluka, štampu iz perida austro-ugarske, te izvještaje o upravi u BiH). Samo takav pristup arhivskoj građi omogućio je autoru da dođe neposredno do relevantnih podataka, što je pretpostvaka validnog istraživanja.

U ovom svom radu, kao i mnogim drugim radovima, autor dokazuje dva kvaliteta – kvalitet vrsnog pravnog historičara te kvalitet civiliste. U datom djelu otišao je korak dalje i pokazao svoj kvalitet pravnog teoretičara. Autor ovog teksta nije prvi autor u BiH koji se u recentnom periodu, kada je vršen niz zakonskih reformi, bavio pitanjem recepcije prava, pravnog transfera i cirkulacije pravnih modela, ali jeste sigurno autor koji se ovoj temi posvetio sistematično, ne kao sporednom već temeljnom pitanju. Pitanje kako je tekla recepcija austrijskog prava općenito (s tim da je fokus u radu recepcija OGZ-a) nije samo historijsko pitanje već može biti putokaz u pravcu kako je potrebno vršiti reformu postojećeg sistema u vrijeme tranzicije. Niti jedan drugi zakon nije u takvoj mjeri kao austrijski Opći građanski zakonik obilježio razvoj materijalnog građanskog prava (ali i procesnog, što nije bilo u fokusu analize) i modernu pravnu praksu u Bosni i Hercegovini. Međutim, do danas nije objavljena sveobuhvatna teorijska analiza njegove recepcije u Bosni i Hercegovini, što će se izmijeniti objavljivanjem



ovog teksta. Ovaj rad ima za cilj ponuditi odgovor na brojna neodgovorena pitanja o fenomenu pojave austrijskog Općeg građanskog zakonika u Bosni i Hercegovini.

Rad je pisan preglednim i lijepim stilom, lako se čita i prati. Struktura rada je dobro promišljena i izbalansirana: svi dijelovi rada su približno istog obima, što je kvalitet na koji se rijetko obrati pažnja. (...)

Navedeni rukopis će prije svega biti vrijedno štivo za studente sva tri ciklusa studija na Pravnom fakultetu Univerziteta u Sarajevu. U okviru niza obaveznih i opcionih predmeta se izučavaju određeni aspekti recepcije OGZ-a u Bosni i Hercegovini. Posebno će produbljena analiza određenih instituta stvarnog, obligacionog i trgovačkog prava biti korisna studentima koji pišu završne radove ili doktorske disertacije, kao početak njihovih istraživanja. To se odnosi na istraživanja u oblasti privatnog prava općenito. Ova je monografija osim toga značajan doprinos teoriji prava a posebno u pitanjima objašnjenja fenomena pravnog transfera, transplantacije prava, cirkuliranja pravnih modela.“

Iz recenzije br. 2 (recenzent prof. dr Željko Bartulović):

„Autor je, radeći na visokoj znanstvenoj razini, objektivno istražio važna pitanja pravne povijesti Bosne i Hercegovine, uspijevajući pri tome objektivno istraživati i potvrditi svoja stajališta. Riječ je o velikom trudu koji treba što prije objaviti. Rad nedvojbeno predstavlja nov i značajan doprinos istraživanju problematike pravne povijesti Bosne i Hercegovine (...) Argumentacije su iscrpne, odmjerene i objektivne te bogate pozivima na literaturu, pravne izvore i sudsku praksu u bilješkama. Djelo je utemeljeno na provjerenim ili provjerljivim podacima. Rad je bogat znanstvenim razmišljanjima te predstavlja poziv drugim znanstvenicima na diskusiju koja će dovesti do novih rezultata. Čitatelji koji nisu znanstvenici, već više znatiželjnici ili zaljubljenici u povijest, također će moći pratiti ovo štivo jer je, i pored znanstvene „težine“, pisano dovoljno razumljivo i jednostavno (...).“

3.2. Članci u časopisima, zbornicima radova i poglavlja u knjigama

Komisija konstatira da je kandidat dr. sc. Mehmed Bečić nakon izbora u akademsko zvanje docent objavio ukupno **osam (8) naučnih radova** (od čega dva rada predstavljaju isti tekst objavljen u dvije jezičke verzije, na engleskom i turskom jeziku, publicirani u istom zborniku) i **jedan (1) istraživački esej**.

U odnosu na kriterij kategorizacije naučnih radova, Komisija konstatira da svih osam (8) naučnih radova spadaju u kategoriju **izvorni naučni rad**, dok se jedan (1) istraživački esej može kategorizirati kao **stručni rad**.

Komisija konstatira da je kandidat navedene naučne radove objavio u publikacijama relevantnih naučnih institucija u Bosni i Hercegovini, Austriji, Srbiji, Crnoj Gori i Turskoj. Radovi su objavljeni na bosanskom, engleskom i turskom jeziku te u velikoj mjeri predstavljaju i rezultat međunarodne akademske i naučne saradnje kandidata sa istraživačima i institucijama u inozemstvu. Uz sve navedeno, Komisija konstatira da ukupan obim svih ovih radova prelazi 200 stranica teksta.

U odnosu na kriterij relevantnosti publikacija u kojima su radovi objavljeni i njihovu indeksiranost u relevantnim naučnim bazama, Komisija je zaključila sljedeće:



- Dva (2) izvorna naučna rada objavljena su u časopisu Godišnjak Pravnog fakulteta u Sarajevu koji se u međunarodnim referentnim bazama CSA Sociological Abstracts (Proquest), CSA Worldwide Political Science Abstracts (Proquest), a puni tekst je uključen u Central and East European Academic Source (EBSCOhost) i Law Journal Library (HeinOnline);
- Jedan (1) izvorni naučni rad predstavlja poglavlje u knjizi *Commercial Law in Southeastern Europe Legislation and Jurisdiction from Tanzimat Times until the Eve of the Great War* koju izdaje renomirani izdavač Brill/Böhlau. Navedena publikacija je indeksirana u bazama Proquest i EBSCO;
- Jedan (1) izvorni naučni rad objavljen je u časopisu Historijska traganja kojeg izdaje Institut za historiju Univerziteta u Sarajevu, a koji je indeksiran u CEEOL – Central and Eastern European Online Library i EBSCO bazama podataka;
- Jedan (1) izvorni naučni rad objavljen je u časopisu Harmonius Journal of Legal and Social Studies in South East Europe iz Beograda, a koji je indeksiran u Law Journal Library (HeinOnline);
- Jedan (1) izvorni naučni rad objavljen je u zborniku radova Zadužbine i fondacije u Crnoj Gori, kojeg je izdala Crnogorska akademija nauka i umjetnosti, kao najuglednija i najrelevantnija naučna institucija u Crnoj Gori;
- Dva (2) izvorna naučna rada (sa istovjetnim tekstom na dva različita jezika) objavljena su u zborniku radova koju izdaje Turska pravna akademija.

U nastavku se iznose detaljni podaci i komisijska analiza/ocjena navedenih radova:

1. Mehmed Bečić, „Njemački, austrijski i domaći izvori materijalnog trgovačkog prava u Bosni i Hercegovini na početku XX stoljeća“, Godišnjak Pravnog fakulteta u Sarajevu, LXV – 2022, 63–89.

Kategorizacija	Izvorni naučni rad (kategorizacija u publikaciji i ocjena Komisije)
Naučne baze / Izdavač	Godišnjak Pravnog fakulteta u Sarajevu indeksira se u međunarodnim referentnim bazama CSA Sociological Abstracts (Proquest), CSA Worldwide Political Science Abstracts (Proquest), a puni tekst je uključen u Central and East European Academic Source (EBSCOhost) i Law Journal Library (HeinOnline)
Komisijska analiza rada	Kandidat je ovim radom uspješno dopunio prazninu u postojećoj pravnoj i pravno-historijskoj literaturi koja se do sada samo uzgredno bavila razvojem modernog trgovačkog prava u Bosni i Hercegovini. Riječ je pravno-historijskoj analizi trgovačkog zakonodavstva BiH iz 1883. godine i analizi sudske prakse na početku XX stoljeća. U radu su korišteni primarni izvori (neobjavljena arhivska građa, relevantni normativni izvori i presude sudova iz datog perioda) i relevantna literatura.



	Autor polazi od teze da je Bosna i Hercegovina 1883. godine recipirala njemačko trgovačko pravo, koje se u trgovačkoj praksi dopunjavalo pravilima austrijskog civilnog prava (Općeg građanskog zakonika iz 1811.) i domaćim trgovačkim običajima. U radu se nastoji dokazati da su ova tri, porijeklom, sadržajem i formom, različita izvora obilježila i transformirala poslovnu/trgovačku i pravnu praksu Bosne i Hercegovine krajem XIX i početku XX stoljeća. Iz rada proizlazi da je autor dokazao postavljene teze o porijeklu, sadržaju i ulozi izvora materijalnog trgovačkog prava u Bosni i Hercegovini na početku XX stoljeća. To su bili: recipirano njemačko trgovačko pravo, austrijsko materijalno civilno pravo i domaći trgovački običaji. Glavni izvor bio je formalno proglašeni državni zakon tj. Trgovački zakon za Bosnu i Hercegovinu iz 1883. godine, čije su praznine popunjavane polufornalnim i nedržavnim izvorima: trgovačkim običajima (koji predstavljaju izvor nedržavnog porijekla) i Općim građanskim zakonikom iz 1811. (koji nije bio formalno proglašen za Bosnu i Hercegovinu). Autor je došao do nove naučne spoznaje da su upravo to bili izvori na kojima je izgrađeno moderno trgovačko pravo Bosne i Hercegovine na početku XX stoljeća.
--	--

2. Mehmed Bečić, “**Commercial disputes and application of Ottoman commercial law in Bosnia and Herzegovina**” in: Loehnig M.; Masheva I.: Commercial Law in Southeastern Europe Legislation and Jurisdiction from Tanzimat Times until the Eve of the Great War, Brill-Böhlau, Wien, 2022, 17-51.

Kategorizacija	Izvorni naučni rad (ocjena Komisije)
Naučne baze / Izdavač	- Publikacija je izdanje Brill/Böhlau - Publikacija je indeksirana u bazama Proquest i EBSCO
Komisijska analiza rada	Autor se u ovom radu bavi potpuno neistraženim fenomenom primjene starog osmanskog trgovačkog zakonodavstva u post-osmanskoj Bosni i Hercegovini (period od 1878. do 1883.). U ovom radu se daje precizna i na relevantnim izvorima utemeljena pravno-historijska rekonstrukcija primjene osmanskog – tanzimatskog trgovačkog prava u Bosni i Hercegovini u ranom post-osmanskom periodu, odnosno u vrijeme prije donošenja Trgovačkog zakona za Bosnu i Hercegovinu (1878-1883). Pri tome se detaljno odgovara na sljedeća pitanja: koje su pravosudne institucije bile nadležne za rješavanje trgovačkih sporova, ko su bili sudije tih sudova, kakvo je materijalno pravo primijenjeno u takvim predmetima, koje su

	dokumente i dokaze stranke koristile, kakva je bila uloga osmanskog prava u sudskim postupcima. Autor je uspješno rasvijetlio ove fenomene i dokazao da je osmansko trgovačko pravo „živjelo“ (living law) u pravnoj praksi Bosne i Hercegovine u ranom post-osmanskome periodu. On je taj fenomen posebno dokazao kroz primjer primjene pravila o naknadi štete iz Osmanskog trgovačkog zakona, koja u domaćoj pravnoj i pravno-historijskoj literaturi uopće nisu bila razmatrana. Time je autor dao značajan doprinos u rasvjetljavanju razvoja modernog građanskog i trgovačkog prava i pravne prakse u Bosni i Hercegovini.
--	--

3. Mehmed Bečić, **“Transformacija pravne prirode mukata i idžaretein vakufa u Bosni i Hercegovini”**, Zadužbine i fondacije u Crnoj Gori, Naučni skupovi Knjiga 158, Odjeljenje društvenih nauka Knjiga 53, Crnogorska akademija nauka i umjetnosti, Podgorica, 2021., 207-232.

Kategorizacija	Izvorni naučni rad (ocjena Komisije)
Naučne baze / Izdavač	Publikacija je izdanje Crnogorske akademije nauka i umjetnosti
Komisijska analiza rada	Autor se u ovom radu bavi problematikom pravne prirode mukata i idžaretein vakufa i pitanjem gruntovnog/zemljišnoknjižnog upisa ovih nekretnina u Bosni i Hercegovini. Autor uspješno dokazuje postavljenu tezu da način gruntovnog upisa mukata i idžaretein vakufa nije odgovarao pravnoj prirodi ovih nekretnina, odnosno kako je njihov upis u zemljišne knjige rezultirao transformacijom njihove pravne prirode i vlasničke strukture. Autor se u radu posebno detaljno bavi motivima zakonodavca za usvajanje ovih spornih zakonskih rješenja i zaključuje da su ovako usvojena zakonska rješenja o upisu mukata i idžaretein vakufa predstavljali rezultat pogrešnog razumijevanja ovih ustanova od austrougarskih pravika involviranih u proces donošenja Gruntovničkog zakona, ali i nastojanja da se ove ustanove prilagode načelima novog zemljišnoknjižnog sistema. Autor ističe da su djelovi ovog rada bazirani na rezultatima istraživanja koja su provedena u okviru projekta „Pravna sudbina sarajevskih vakufa“. Ovi rezultati dopunjeni su novim istraživanjima, koja su provedena kroz obradu relevantne domaće i strane literature, analizu arhivskih i normativnih izvora, te gruntovnih izvadaka vakufskih nekretnina u Bosni i Hercegovini.



	Obrada ovih izvora oslanja se pretežno na diskurzivni, historijski i pravni metod. Imajući to u vidu, Komisija zaključuje da se ovim radom daje značajan doprinos u razumijevanju problema gruntovnih upisa vakufskih nekretnina – što je osnovna pretpostavka za rješavanje spornih pitanja koje se svakodnevno pojavljuju u domaćoj pravnoj praksi (u vezi vakufske imovine).
--	---

4. Mehmed Bečić, **“Trgovački sporovi u Bosni i Hercegovini: osvrt na sudove, stranke, predmete i dokumente ranog postosmanskog perioda”**, Historijska traganja – Historical Searches 20/2021, 143-171.

Kategorizacija	Izvorni naučni rad (ocjena Komisije)
Naučne baze / Izdavač	Publikacija je indeksirana u CEEOL – Central and Eastern European Online Library i EBSCO bazama podataka
Komisijaska analiza rada	Autor sa ovim radom popunjava još jednu prazninu vezanu za istraživanja razvoja modernog trgovačkog prava u Bosni i Hercegovini. Ovdje se bavi analizom trgovačkih sudskih procesa tokom posljednje decenije osmanske i prvih pet godina austrougarske uprave. In concreto: kako je tekla tranzicija trgovačkih sudova iz osmanskog u novi austrougarski model; da li su sudovi primjenjivali novo osmansko trgovačko pravo; ko su bile sudije, a ko stranke u trgovačkim predmetima; kakav je bio sadržaj trgovačkih predmeta; kako su izgledali dokumenti koji su korišteni kao dokazi u trgovačkim sporovima i dr. Ovdje je namjerno izostavljeno pitanje detaljne analize primjene materijalnog i procesnog/formalnog prava u trgovačkim predmetima, s obzirom na složenost ovog pitanja koje zahtijeva dodatno i šire istraživanje (ovo će autor obraditi kasnije u gore spomenutoj studiji “Commercial disputes and application of Ottoman commercial law in Bosnia and Herzegovina”). Istraživanje je bazirano na neobjavljenim arhivskim izvorima iz Arhiva Bosne i Hercegovine u formi tužbi, sudskih zapisnika, presuda, obveznica – seneta, mjenica i drugih dokumenata. Pored arhivskih, u radu su korišteni i brojni normativni i novinski izvori, kao i historijska i pravno-historijska literatura. Kao takav, rad se može ocijeniti kao značajan doprinos historijskoj i pravno-historijskoj literaturi.



5. Mehmed Bečić, **“Did Austrian Judges Apply the Mecelle in Post-Ottoman Bosnia?”**, in: Uluslararası Mecelle Sempozyumu (International Majalla Symposium Book), Türkiye Adalet Akademisi, Bursa, 2021., 661-671.
6. Mehmed Bečić, **“Osmali Sonrası Bosna’da Avustrurayali Hakimler Mecelleyi Uyguladılar Mi?”**, in: Uluslararası Mecelle Sempozyumu (International Majalla Symposium Book), Türkiye Adalet Akademisi, Bursa, 2021., 567-577.
Napomena: Isto kao pod 5, samo u prevodu na turskom jeziku.

Kategorizacija	Izvorni naučni rad (ocjena Komisije)
Naučne baze / Izdavač	Publikacija je izdata od Turske pravne akademije
Komisijska analiza rada	U ovom radu, autor traži odgovor na jedno, naizgled, prosto pitanje: da li su sudije iz Austro-Ugarske primjenjivali Medžellu u pravnoj praksi. Odgovor na ovo pitanje autor nalazi na osnovu brojnih prvorazrednih historijskih izvora i postojeće literature. Autor se pri tome naslanja na neka svoja ranije istraživanja objavljena u Godišnjaku Pravnog fakulteta koja dodatno razrađuje i reinterpreтира. Tako dolazi do zaključka da su austrougarske sudije u Bosni i Hercegovini bili prinuđeni primjenjivati rješenja Medželle i to uporedo sa Općim građanskim zakonikom, posebno u vezi specifičnih pravnih pitanja i instituta. Značaj ovog rada posebno se ogleda u tome što je publiciran dvojezično (engleski i turski) u zborniku koji je okupio stručnjake za šerijatsko pravo i pravnu historiju iz cijelog svijeta.

7. Mehmed Bečić, **„Kontinuitet naučnih debata o pravnim transplantima u zapadnoj pravnoj misli“**, Harmonius – Journal of Legal and Social Studies in South East Europe, 2019, 19-50.

Kategorizacija	Izvorni naučni rad (ocjena Komisije)
Naučne baze / Izdavač	Publikacija je indeksirana u Law Journal Library (HeinOnline)
Komisijska analiza rada	Ovaj rad predstavlja spoj pravne historije, historije pravne misli u zapadnoj literaturi i teorije komparativnog prava. U radu se ukazuje na kontinuitet suprotstavljenih teza i zaključaka o zakonitostima pravne transplantacije, odnosno kontinuitetu oprečnih mišljenja zapadnih pravnih mislilaca i teoretičara o mjestu i ulozi pravnih transplanta u razvoju prava. Izvor tih suprotstavljenih stavova i mišljenja autor vidi u samom pristupu i poimanju prava, s obzirom da su učesnici tih debata bili autori



	različitih naučnih provenijencija. Oni su, u većoj ili manjoj mjeri, bili učesnici rasprave koja se svodi na pitanje „za ili protiv“ transplantacije kao glavnog sredstva razvoja i transformacije prava. Autor odbacuje jednostavne i generalne zaključke o fenomenu pravne transplantacije. On se, umjesto toga, zalaže za interdisciplinarni pristup u izučavanju pravnih transplanta, sa jasno definiranim predmetom i ciljem istraživanja. Bazu ovog interdisciplinarnog pristupa grade pravna historija i komparativno pravo, zbog predmeta istraživanja te teorija i sociologija prava, koje daju nužne analitičke okvire i alate. Ovim radom autor je domaćem čitateljstvu dao jednostavan uvid u vrlo opširnu literaturu o recepciji prava/pravnoj transplantaciji u zapadnoj pravnoj misli. Pored toga, značaj ovog rada leži u tome što se daju i jasni prijedlozi za (nove) i sveobuhvatne pravce i pristupe u izučavanju fenomena recepcije prava/pravne transplantacije u pravnoj historiji i općenito u pravnim naukama.
--	--

8. Mehmed Bečić, „**Pretvaranje mukata vakufa u Bosni i Hercegovini u privatno vlasništvo posjednika**“, Godišnjak Pravnog fakulteta u Sarajevu, 2019, 33-76.

Kategorizacija	Izvorni naučni rad (kategorizacija u publikaciji i ocjena Komisije)
Naučne baze / Izdavač	Godišnjak Pravnog fakulteta u Sarajevu indeksira se u međunarodnim referentnim bazama CSA Sociological Abstracts (Proquest), CSA Worldwide Political Science Abstracts (Proquest), a puni tekst je uključen u Central and East European Academic Source (EBSCOhost) i Law Journal Library (HeinOnline)
Komisijaska analiza rada	Ovaj autorov rad nastao je kao rezultat istraživanja u okviru projekta "Pravna sudbina sarajevskih vakufa". U njemu je autor iznio opsežne, naučno i empirijski utemeljene zaključke o uzrocima, modalitetima i posljedicama upisa mukata vakufa u zemljišne knjige u Bosni i Hercegovini, sa posebnim osvrtom na mukata vakufe u Sarajevu. Ključna pitanja na koja se u radu daje odgovor su: Koji su to bili službeni i neslužbeni motivi/razlozi za usvajanje zakonskih pravila o upisu mukata vakufa u zemljišne knjige? Kako je izgledala primjena ovog pravila na terenu? Da li je vakufu u svakom konkretnom slučaju gruntovnim upisom oduzimano pravo vlasništva ili je bilo izuzetaka od tog pravila? Da li je u svakom slučaju vakuf kao ustanova pretrpio štetu u korist



zakupaca-fizičkih lica ili je knjiženje prava vlasništva vršeno u korist drugih vakufa?

Osim ovih ključnih pravnih pitanja, u radu se iznose određeni do sada neobjavljeni sadržaji o borbi vakufske uprave za ispravljanje spornog gruntovnog upisa mukata vakufa. Pošto je o ovom pitanju 1913. odlučivao i Vrhovni sud za Bosnu i Hercegovinu, u radu se analizira rasprava i mišljenje Vrhovnog suda o spornom upisu mukata vakufa.

Autor u ovom radu analizira preko 360 gruntovnih izvadaka vakufskih nekretnina u Sarajevu, čime je dobio uvid u broj i lokacije mukata vakufa u Sarajevu, kao i u vlasničku strukturu i opterećenost mukata nekretnina. U tom smislu je analiza mukata vakufa u sarajevskoj čaršiji poslužila kao "studija slučaja" za ispitivanje općeprihvaćenih teza o ovom problemu.

Pored analize preko 360 gruntovnih izvadaka, rad se bazira na neobjavljenoj arhivskoj građi, relevantnim zakonskim propisima, kao i literaturi koja se bavi ovim pitanjima.

U svojim zaključcima autor iznosi i obrazlaže razloge i motive zakonodavca za usvajanje rješenja (upisa mukata u zemljišne knjige), koje je bilo suprotno pravnoj prirodi ove vrste vakufa. Zaključeno je da su glavni razlozi: pogrešno razumijevanje ovog instituta od strane članova zakonodavnih komisija involviranih u proces donošenja Gruntovničkog zakona i nastojanje zakonodavca da mukata vakufe prilagodi načelima novog zemljišnoknjižnog sistema, a posebno načelu superficies solo cedit. U okviru navedene analize rekonstruirana je i rasprava Vrhovnog suda iz 1913. godine o pitanju ispravnosti gruntovnog upisa mukata vakufa.

Analizom preko 360 gruntovnih izvadaka vakufskih nekretnina u Sarajevu, autor je došao do zaključka da su na području katastarske općine Sarajevo - Carsija (br. I do X) postojala zemljišta pod mukatom koja su pripadala Gazi Isa-begovom vakufu, Gazi Husrev-begovom vakufu, Gazi Mehmed-begovom vakufu i Firaz-begovom vakufu. Pored ovih vakufa, postojao je i jedan manji broj parcela izdatih pod mukatu, koje su pripadale drugim vakufima.

Analiza gruntovnih ulozaka je potvrdila teze o transformaciji pravne prirode i vlasničke strukture na mukata vakufima. Samo jedan mali broj parcela uknjižen je kao vlasništvo vakufa-stvarnog vlasnika zemljišta. Istraživanje je također pokazalo da su, osim fizičkih lica, i drug vakufi vrlo često bili posjednici / zakupci vakufskog zemljišta pod mukatom. U tom slučaju su u procesu osnivanja gruntovnica drugi vakufi, a ne fizička lica, upisani kao



	vlasnici u zemljišne knjige. Iako je i ovaj modalitet upisa bio sporan i nepravilan, svi ovakvi slučajevi gruntovnog upisa proizvodili su drugačije pravne posljedice od upisa fizičkih lica kao vlasnika. Za pravnu sudbinu mukata vakufa u XX stoljeću bila je odlučujuća činjenica da li su one izvorno u gruntovnicama upisane kao vlasništvo posjednika-fizičkih lica ili posjednika-drugih vakufa. Od toga je zavisilo da li su te nekretnine bile u pravnom prometu i kako će biti tretirane pri nacionalizaciji imovine u okviru socijalističke Jugoslavije. Komisija zaključuje da ovaj rad predstavlja izvornu naučnu studiju koja objašnjava zašto i kako su mukata vakufi upisani u moderne zemljišne knjige. Imajući u vidu sve učestalije probleme u današnjoj pravnoj praksi u vezi sa upisanim teretima - mukatama u c-listu (teretovnicama) u zemljišnim knjigama, Komisija zaključuje da ovaj rad, osim naučnog, ima praktični značaj i da već danas u pravnoj praksi služi kao naučna podloga za rješavanje problema i sporova povezanih sa nekretninama koje su opterećene mukatom.
--	---

9. Mehmed Bečić, „**Inventivnost u nevolji: Jesmo li spremni za digitalnu eru visokog obrazovanja**“, Serija “Pandemija i pravo” Eseji, osvrti i komentari br. 6/2020, Pandemija i pravo, Pravni fakultet Univerziteta u Sarajevu
Napomena: rad predstavlja istraživački esej

Kategorizacija	Stručni rad
Naučne baze / Izdavač	Pravni fakultet Univerziteta u Sarajevu
Komisijska analiza rada	Autor ovim radom istražuje trenutnu i moguću buduću praksu upotrebe informacionih tehnologija digitalnog doba u oblasti visokog obrazovanja u Bosni i Hercegovini. Rad se oslanja na prethodno obavljeno istraživanje procesa realizacije on-line nastave na Univerzitetu u Sarajevu za vrijeme pandemije Covida-19 tokom marta i aprila 2020. godine obavljeno metodom anketnog ispitivanja, 2 intervjua i internet pretrage (o procesu realizacije on-line nastave na UNSA i dostupne ponude novih tehnologija namijenjenih oblasti obrazovanja).



4. Naučni i stručni projekti

4.1. Učešće u projektima prije izbora u akademsko zvanje docent

Kandidat dr. sc. Mehmed Bečić je prije izbora u akademsko zvanje docent učestvovao u međunarodnom naučno-istraživačkom projektu Max-Planck instituta za evropsku pravnu historiju u Frankfurtu pod nazivom Conflict and coexistence: The legal systems of Southeastern Europe in the 19th and 20th centuries. Projekat je realiziran u periodu između 2012. i 2017. godine, a okupio istraživače iz nekoliko zemalja. Projekat je realiziran kroz nekoliko naučnih skupova, a rezultirao je objavom knjige u izdanju Max Planck instituta za evropsku pravnu historiju, u kojoj je autor objavio rezultate svojih višegodišnjih istraživanja na temu razvoja privatnog prava u Bosni i Hercegovini pod austrougarskom upravom (vidi: listu publikacija).

Pored toga, kandidat je prije izbora u akademsko zvanje docent bio autor i voditelj jednog stručnog projekta u nevladinom sektoru. Riječ je o projektu "One step Forward: Strengthening Civil Society Capacities in the Democratic Practice of Public Consultations" iz 2015. godine u organizaciji Centra za primijenjeno znanje (projekat je realiziran kao višednevni seminar).

4.2. Naučni i stručni projekti nakon izbora u akademsko zvanje docent (autorstvo kandidata)

Komisija konstatira da je kandidat dr. sc. Mehmed Bečić **nakon izbora u akademsko zvanje docent samostalno kreirao (idejni autor) i/ili vodio 3 projekta**, od kojih je jedan naučno-istraživačkog, a dva nastavno-naučnog sadržaja i karaktera. Svi navedeni projekti predstavljaju rezultat naučne saradnje različitih naučnih i drugih ustanova, kao i istraživača iz raznih naučnih/umjetničkih oblasti, a redovno su involvirali i učešće studenata i studentica sa Univerziteta u Sarajevu.

U nastavku se daju podaci o svakom od navedenih projekata:

2022. – 2023.

Autor i voditelj projekta: "Legal essentials" (prevod: „Pravne osnove“) - Pravni fakultet Univerziteta u Sarajevu i Akademija likovnih umjetnosti Univerziteta u Sarajevu)

Legal essentials predstavlja nastavno-naučni projekat koji služi integraciji modernih tehnologija digitalne ere u oblast pravničkog obrazovanja. Riječ je o projektu, koji kao takav predstavlja novinu i do sada nije realiziran u Bosni i Hercegovini, te predstavlja spoj: pravne nauke, umjetnosti, moderne tehnologije digitalnog doba.

Projektom Legal essentials nastoje se dopuniti i obogatiti oblici nastave kroz integriranje kratkih video (multimedia) sadržaja u nastavni proces. Time se, pored klasičnih ex cathedra predavanja, literature i seminara, studentima nudi poseban dodatak: audio-vizuelni sadržaji uz pomoć kojih će lakše savladati i bolje razumjeti nastavnu materiju.

Projekat je realiziran kroz nekoliko aktivnosti:

- Kreiranje kratkih multimedijalnih sadržaja (1-5 minuta) u kojima se daje jednostavno objašnjenje vrlo složenih pravnih fenomena (npr. Daytonski ustav, organizacija pravosuđa u BiH, institucije EU, ugovorno pravo, tužbe itd.);



- Sadržaji se postavljaju na oficijelni You-Tube i druge stranice relevantnih ustanova;
- Multimedijalni sadržaji integriraju se u nastavni proces na Pravnom fakultetu i služe studentima kao dopuna klasičnim predavanjima i korištenju literature – studentima se na taj način nude tri medija usvajanja znanja: predavanje, literatura i multimedija sa društvenih mreža.

Projekat je realiziran kroz saradnju dvije ustanove: Pravni fakultet i Akademija likovnih umjetnosti Univerziteta u Sarajevu.

Tekstualni (narativni) dio ovih multimedijalnih nastavnih sadržaja pripremaju nastavnici i saradnici Pravnog fakulteta, dok se forma (umjetnička obrada - multimedije) priprema u okviru Akademije likovnih umjetnosti.

Projekat podrazumijeva i uključenost studenata: multimedijalne sadržaje pripremaju studenti u okviru nastavnih aktivnosti, uz mentorstvo i koordinaciju nastavnika – profesora i saradnika iz oblasti multimedije. Angažman studenata se odvija kroz nastavne i vannastavne aktivnosti.

Svi ovi sadržaji su slobodno dostupni na navedenim kanalima te su dostupni i za širu publiku – ko god je zainteresiran da nauči nešto novo iz oblasti prava (državno uređenje, krivični postupak, sklapanje ugovora itd.) može dobiti provjerenu i naučnu utemeljenu informaciju na ovom mediju.

Projekat Legal Essentials ima jedan osnovni (primarni) i nekoliko sekundarnih ciljeva.

Primarni cilj projekta je ponuditi novi, dopunski medij pravnog obrazovanja, prilagođenog digitalnoj eri. Sekundarni ciljevi su: funkcija pilot projekta: akademskoj zajednici ponuditi nova rješenja – upotrebu sofisticiranog multimedijalnog sadržaja (uključujući društvene mreže) u realizaciji nastavnog procesa, promocija nauke prilagođena digitalnoj eri, promocija provjerenih informacija, promocija interdisciplinarnosti u okviru akademske zajednice.

Komisija je utvrdila da je u toku 2022. godine ovaj projekat rezultirao kreiranjem i objavom ukupno 5 multimedijalnih sadržaja koji su slobodno dostupni na internetu. Radi se o multimedijalnim sadržajima koji na jednostavan način objašnjavaju vrlo složene pravne i pravno-historijske fenomene, a koji predstavljaju dio nastavnog gradiva univerzitetskog studija prava.

2019. – 2022.

Autor projekta: „Pravna sudbina sarajevskih vakufa“ (Pravni fakultet Univerziteta u Sarajevu i Vakufska direkcija, projekat podržala Vlada Kantona Sarajevo)

Pravna sudbina sarajevskih vakufa predstavlja naučno-istraživački projekat, čiji je idejni autor i autor studija bio dr. Mehmed Bečić, dok je voditelj projekta bio prof. dr Enes Durmišević. U projekat su bili uključeni i dr. Mirza Hebib, dr. Amila Svraka-Imamović i Tahir Herenda, MA. Pored navedenih članova akademskog osoblja, u naučno-istraživačke aktivnosti na realizaciji ovog projekta bili su uključeni i studenti u okviru seminara.

Projekat je realiziran uz aktivnu saradnju sa sljedećim institucijama:

- Vakufska direkcija Islamske zajednice u BiH
- Gazi Husrev-begova Biblioteka
- Historijski arhiv Sarajevo



Pored navedenih domaćih institucija, projektne aktivnosti su uključile i saradnju sa Crnogorskom akademijom nauka i umjetnosti (kroz izlaganje rezultata istraživanja na regionalnom naučnom skupu i publikaciju rada u posebnom zborniku CANU).

U okviru projekta ostvaren je glavni cilj publikacije radova u okviru kojih su izloženi rezultati istraživanja, i to:

- Mehmed Bečić, „Pretvaranje mukata vakufa u Bosni i Hercegovini u privatno vlasništvo posjednika“, Godišnjak Pravnog fakulteta u Sarajevu, 2019, 33-76.
- Mehmed Bečić, „Pravna priroda mukata i idžaretein vakufa“, Zbornik radova sa Okruglog stola Zadružbine i fondacije u Crnoj Gori, 2021, Naučni skupovi, Knjiga 158, Odjeljenje društvenih nauka, Knj. 53, str. 207-232.

Projekat je finaliziran organiziranjem naučnog skupa pod nazivom „Pravna sudbina mukata-vakufa“, koji je održan 02. juna 2022. u Svečanoj sali Rektorata Univerziteta u Sarajevu. Skup je organiziran u saradnji Pravnog fakulteta Univerziteta u Sarajevu i Vakufske direkcije Islamske zajednice u BiH, koja je ovaj događaj integrirala i u program „10. Dani vakufa“. Cilj naučnog skupa bilo je aktualiziranje pitanja pravnog statusa mukata – posebno u kontekstu pozitivnih zakonskih rješenja, ali i nekih budućih rješenja i modaliteta reguliranja u okviru zakona o restituciji nacionalizirane imovine de lege ferenda.

2019. – 2022.

Autor projekta: **„Zemaljski kontinuitet: Digitalna zbirka državnopravnih dokumenata BiH“**

Navedeni projekat predstavlja nastavno-naučni projekat. Doc. dr Mehmed Bečić je autor i saradnik ovog projekta, voditelj projekta bio prof. dr Enes Durmišević. Ostali saradnici na projektu bili su dr. Mirza Hebib i dr. Dženan Dautović.

Projekat je rezultirao digitalizacijom, naučnom obradom i internetskom publikacijom virtualne zbirke državnopravnih dokumenata vezanih za Bosnu i Hercegovinu. Pod digitalizacijom se, u ovom projektu, podrazumijeva proces skeniranja, fotografiranja, te optičkog prepoznavanja slova („OCR-Optical character recognition“) izvornih (originalnih) dokumenata od državnog značaja.

Nakon provedenog postupka digitalizacije izvršena je djelimična naučna obrada digitalizirane građe, koja obuhvata transkripciju (uz korištenje već objavljenih transkripcija), zatim istraživanje i pisanje kraćih naučnih osvrti i komentara o historijskom kontekstu donošenja dokumenta, kao i historijskom, državnopravnom i političkom značaju dokumenta za Bosnu i Hercegovinu.

Poslije završene digitalizacije i naučne obrade kompletne građe, javna prezentacija projekta i njegova internetska publikacija na Portalu projekta www.zemaljskikontinuitetbih.edu.ba (Komisija konstatira da je navedena adresa trenutno neaktivna).



4.3. Učešće u projektima drugih istraživača i ustanova

Pored projekata koje je samostalno kreirao i/ili vodio, kandidat je nakon izbora u akademsko zvanje docenta učestvovao u raznim domaćim i međunarodnim naučnim projektima koje su kreirali, vodili i organizirali drugi istraživači i naučne ustanove.

U nastavku se navode takve projektne aktivnosti kandidata:

2019.- danas

Projekat: Kaufrecht in Mitteleuropa – Entstehung und Wirkungsgeschichte der Art 337-359 ADHGB (Prof. Dr. Martin Loehnig, Univerzitet Regensburg)

Kandidat dr. Mehmed Bečić je istraživač/učesnik u projektu i autor studije u okviru projekta. Radi se o međunarodnom naučno-istraživačkom projektu koji se koordinira od strane prof. dr. Martina Loehniga sa Univerziteta u Regensburgu, a koji je podržan od strane Njemačkog društva za istraživanje (DFG – Deutsche Forschungsgemeinschaft). Projekat ima za cilj da istraži proces utjecaja Općeg njemačkog trgovačkog zakonika na zemlje srednje i jugoistočne Evrope. Projekat okuplja naučne radnike i istraživače iz nekoliko evropskih zemalja (Njemačka, Austrija, Bosna i Hercegovina, Hrvatska, Mađarska, Poljska, Češka) i treba da rezultira objavom knjige u kojoj će biti izloženi rezultati ovih višegodišnjih istraživanja i održanih naučnih konferencija.

2022. - danas

Historija Bosne i Hercegovine (Institut za historiju Univerziteta u Sarajevu)

Navedeni projekat predstavlja naučno-istraživački projekat koji provodi Institut za historiju Univerziteta u Sarajevu. Projekat okuplja nekoliko desetina akademskih/naučnih radnika i istraživača, sa ciljem da se napiše historija Bosne i Hercegovine. Kandidat je istraživač i autor studije u okviru navedenog projekta.

2019-2022:

Commercial Law in South-Eastern Europe from the Tanzimat Period until the Eve of the Great war (Prof. Dr. Martin Loehnig, Univerzitet Regensburg)

Navedeni projekat predstavlja međunarodni naučno-istraživački projekat, koji ima za cilj da istraži fenomen utjecaja osmanskog trgovačkog prava na pravne sisteme jugoistočne Evrope. Voditelj projekta je prof. dr. Martin Loehnig sa Univerziteta u Regensburgu, a u sam projekat uključeni su istraživači iz nekoliko država (Bosna i Hercegovina, Bugarska, Srbija, Njemačka). Projekat je realiziran kroz međunarodne naučne skupove na kojima su predstavljeni rezultati istraživanja te konačno i publikacijom knjige *Commercial Law in Southeastern Europe Legislation and Jurisdiction from Tanzimat Times until the Eve of the Great War* koju je izdao renomirani Brill/Böhlau u Beču 2022. godine. Kandidat dr. Mehmed Bečić je bio učesnik u ovom projektu i autor je studije u navedenoj knjizi (vidi: listu publikacija).



5. Naučne i stručne konferencije, skupovi i seminari

5.1. Konferencije, skupovi i seminari - kandidat kao autor ili organizator i učesnik

Komisija konstatira da je kandidat dr. Mehmed Bečić, u svojstvu idejnog autora i/ili člana organizacionih odbora i izlagača, učestvovao u sljedećim javnim naučnim i stručnim manifestacijama:

1. **Prva panel diskusija o digitalizaciji i pravu: „Blockchain i digitalizacija imovine: izazovi pravnoj regulativi u BiH“** (Univerzitet u Sarajevu – Pravni fakultet, 27 maj 2022.)

Kandidat dr. sc. Mehmed Bečić je idejni autor, organizator i izlagač u okviru ovog panela;

2. **Naučni skup: Pravna sudbina mukata-vakufa** (Univerzitet u Sarajevu – Pravni fakultet i Vakufska direkcija, 2. jun 2022.)

Kandidat dr. sc. Mehmed Bečić je autor projekta, član organizacionog odbora, autor studije i izlagač na skupu;

3. **Seminar: “Korak naprijed: jačanje kapaciteta civilnog društva u demokratskoj praksi javnih konsultacija** (Centar za primijenjeno znanje Brčko, Brčko, 4-7 December, 2015.)

Kandidat dr. sc. Mehmed Bečić je autor projekta i predavač u okviru projekta;

4. **Međunarodni naučni skup: „550 godina Ahdname“** (Univerzitet u Sarajevu, Pravni fakultet, 28 maj, 2013.)

Kandidat dr. sc. Mehmed Bečić je bio član organizacionog odbora i izlagač na skupu;

5. **Međunarodni naučni skup „200 godina Općeg građanskog zakonika“** (Univerzitet u Sarajevu - Pravni fakultet, 28. oktobar 2011.)

Kandidat dr. sc. Mehmed Bečić je bio član organizacionog odbora i izlagač na skupu;

5.2. Konferencije, skupovi i seminari (kandidat isključivo kao učesnik)

Komisija konstatira da je kandidat dr. sc. Mehmed Bečić, kao učesnik/izlagač, učestvovao na ukupno 17 javnih naučnih i stručnih manifestacija, i to:

1. **Međunarodni naučni skup „Kaufrecht ni Mitteleuropa- Entstehungs- und Wirkungsgeschichte der Art. 337 ff. ADHGB“** – „Pravo kupoprodaje u srednjoj Evropi - nastanak i historija utjecaja članova 37 i dalje Općeg njemačkog trgovačkog zakonika“ (Univerzitet Regensburg, 19. i 20. maj 2022.);
2. **Predavanje na tribini Kluba pravnika Grada Zagreba i Pravnog fakulteta Sveučilišta u Zagrebu na temu: Bitcoin, blockchain i digitalizacija imovine: izazovi pravne regulative** (16. februar 2022. online);



3. **Međunarodni naučni skup pod naslovom Commercial Law in South-Eastern Europe: Legislation and Jurisdiction from Tanzimat Times until the Eve of the Great War** (Univerzitet Regensburg, online, 19. novembar 2020.);
4. **Međunarodni naučni skup na temu prava kupoprodaje prema članu 354-359 Njemackog Općeg trgovačkog zakonika (ADHGB) pod naslovom Kaufrecht in Mitteleuropa - Leistungsstörungenrecht: Art. 354-359 ADHGB** (Univerzitet Regensburg – online, 29. i 30 oktobar 2020.)
5. **Akademija evropskih integracija: Teorijski i praktični aspekti harmonizacije propisa Evropske unije sa nacionalnim pravom Bosne i Hercegovine** (Konrad Adenauer fondacija i Pravni fakultet Univerziteta u Sarajevu, 31. oktobar i 01. novembar 2019.);
6. **Međunarodni okrugli sto “Zadužbine i fondacije u Crnoj Gori”** (Crnogorska akademija nauka i umjetnosti, Podgorica, oktobar, 2019.);
7. **Naučni/stručni skup „Autonomija univerziteta“** (Centar za javno pravo Sarajevo, 6. mart 2018.);
8. **Međunarodni naučni simpozij „International Majalla Symposium: Codification, Practice and Contemporary Effects“** (Bursa/Turska, 25 - 27. septembar 2017.);
9. **Okrugli sto „Curricula on European and International law“** (Europa institut Saarbruecken, 30 novembar. – 1. decembar 2017.);
10. **Naučni skup „Historija države i prava BiH – izazovi i perspektive“** (JU Zavod za zaštitu i korištenje kulturno-historijskog i prirodnog naslijeđa Tuzlanskog Kantona, Tuzla, 28-30. novembar 2014.);
11. **Naučni skup: „Bosanskohercegovačke pravne tradicije u procesu prilagodbe pravnim tekovinama Evropske unije“** (Pravni fakultet Univerziteta u Zenici, Zenica, 06. decembar 2013.);
12. **Međunarodni naučni skup u okviru projekta: „Die Entstehung nationaler Rechtssysteme im postosmanischen Südosteuropa“** (Pravni fakultet Univerziteta u Beogradu, Beograd, 2012.);
13. **Međunarodni naučni skup u okviru projekta: „Konflikt und Koexistenz: Die Rechtsordnungen Südosteuropas im 19. und 20. Jahrhundert“** (Institut für Rechts- und Verfassungsgeschichte, Juristische Fakultät der Universität Wien, Beč, 25-26. februar 2011.);



14. **Međunarodni naučni skup „100 Jahre bosnisches Landesstatut“** (Institut für Rechts- und Verfassungsgeschichte, Juristische Fakultät der Universität Wien, Beč, 26-27. novembar 2010.);
15. **Međunarodni naučni skup (učešće kao student - demonstrator) „Law and Politics in the Late Roman Republic“** (Karl-Franzens-Universität Graz, Retzhof, 17-20 april, 2008.);
16. **Međunarodni naučni skup (učešće kao student - demonstrator) „Risk Management in Antiquity“** (Albert-Ludwigs Universität Freiburg, 17-20 maj 2007.);
17. **Seminar (učešće kao student) „Understanding the past for shaping a better common future“** (Konrad Adenauer Stiftung, Brasov-Rumunija, 23-27. april 2007.).

6. Nastavničke sposobnosti, mentorstva i drugi nastavni doprinosi:

Komisija konstatira da je dr. sc. Mehmed Bečić od 2009. godine uključen u realizaciju nastave na Pravnom fakultetu Univerziteta u Sarajevu, i to na grupi predmeta koji pripadaju naučnoj oblasti Pravna historija. Od 2018. godine je u svojstvu docenta odgovorni nastavnik na sljedećim nastavnim predmetima:

- Historija države Bosne i Hercegovine (I ciklus studija)
- Historija prava Bosne i Hercegovine (I ciklus studija)
- Razvoj zemljišne knjige u Bosni i Hercegovini (I ciklus studija)
- Razvoj pravne kulture u Bosni i Hercegovini (II ciklus studija)
- Recepcija prava u jugoistočnoj Evropi (II ciklus studija)
- Ustavna historija Bosne i Hercegovine (II ciklus studija)
- Pravni pluralizam u Bosni i Hercegovini (II ciklus studija)

Komisija konstatira da je kandidat bio ujedno i autor i/ili koautor navedenih nastavnih predmeta i njihovih sadržaja, a zatim i aktivno učestvovao u njihovoj reformi u okviru svih evaluacija i reformi studijskih planova i programa sva tri ciklusa studija na Pravnom fakultetu Univerziteta u Sarajevu.

Komisija konstatira da je kandidat uspješno apsolvirao i odgovarajuću obuku - „TRAIN“ (Training & Research for Academic Newcomers), koji predstavlja program cjeloživotnog učenja u oblasti pedagoškog obrazovanja i jačanja kompetencija akademskog osoblja Univerziteta u Sarajevu, a koji se vrednuje sa ukupno 6 ECTS bodova.

Na osnovu uvida u rezultate anketa – evaluacija nastavnih predmeta i akademskog osoblja koji je provodio Pravni fakultet Univerziteta u Sarajevu, Komisija konstatira da je kandidat redovno ocjenjivan pozitivnim i visokim ocjenama te je dobio pohvale za rad u nastavi od anketiranih studenata i studentica I i II ciklusa studija.



Uvidom u podnesene potvrde izdate od Pravnog fakulteta Univerziteta u Sarajevu, Komisija konstatira da je kandidat bio mentor za šest (6) uspješno odbranjenih završnih radova na drugom ciklusu (master) studiju te da je bio član deset (10) komisija za ocjenu i odbranu završnih radova na master studiju (broj se odnosi na realizirane odbrane završnih radova) i član dvije (2) komisije za ocjenu i odbranu doktorske disertacije (broj se odnosi na realizirane odbrane doktorskih disertacija).

Pored toga, kandidat je bio uključen i u vannastavne - tj. aktivnosti studentskih udruženja, za što su mu Udruženje studenata Pravnog fakulteta i Studentski parlament Univerziteta u Sarajevu izdali i posebne zahvalnice.

ZAKLJUČNA OCJENA I PRIJEDLOG KOMISIJE

Na konkurs za izbor jednog nastavnika u akademsko zvanje vanrednog profesora na naučnoj oblasti Pravna historija na Pravnom fakultetu Univerziteta u Sarajevu prijavio se **jedan (1) kandidat**:

- **Dr. sc. Mehmed Bečić, docent Pravnog fakulteta Univerziteta u Sarajevu na naučnoj oblasti Pravna historija.**

Analizom podnesene prijave i dokumentacije navedenog kandidata, Komisija procjenjuje da se radi kandidatu koji je ostvario izvanredne rezultate u svom dosadašnjem akademskom, naučnom i nastavnom radu, kao i o kandidatu sa značajnim društvenim angažmanom. Komisija je zaključila da je kandidat u svojim naučnim radovima bavio pretežno neistraženim pitanjima iz pravne historije Bosne i Hercegovine, da je rezultate svojih istraživanja objavio u relevantnim domaćim i stranim publikacijama te da je realizirao brojne naučno-istraživačke, nastavne i stručne projekte, sa domaćim i međunarodnim predznakom. Kandidat ima bogatu akademsku i naučnu saradnju sa najuglednijim naučnim institucijama u zemlji i inostranstvu, čime daje doprinos u razvoju pravne historije kao discipline, kao i internacionalizaciji i vidljivosti domaće nauke i Univerziteta u Sarajevu.

Komisija posebno cijeni:

1. Vrijeme provedeno u akademskom zvanju

Kandidat je od 2009. godine prošao kroz tri akademska zvanja **na naučnoj oblasti Pravna historija** na Pravnom fakultetu Univerziteta u Sarajevu: u zvanju asistenta (od 2009. do 2013.), u zvanju višeg asistenta (od 2013. do 2018.) i u **zvanju docenta (od 2018. do 2023.)**.

2. Objavljene radove nakon izbora u akademsko zvanje docent

Kandidat je objavio **ukupno 21 naučnih radova, prikaza i eseja**.



Do posljednjeg izbora u akademsko zvanje (akademsko zvanje docenta) objavio je ukupno 11 naučnih radova i dva (2) prikaza. Većina radova (ukupno 10) objavljena u publikacijama indeksiranim u relevantnim međunarodnim naučnim bazama, uključujući i jedan rad koji je objavljen u publikaciji prestižne naučne institucije za pravnu historiju u Evropi (Max Planck institut za evropsku pravnu historiju u Frankfurtu).

Nakon izbora u akademsko zvanje docent, kandidat je objavio ukupno osam (8) naučnih radova (od čega dva rada predstavljaju isti tekst objavljen u dvije jezičke verzije, na engleskom i turskom jeziku, publicirani u istom zborniku) i **jedan (1) istraživački esej**. Svih 8 naučnih radova predstavljaju **izvorne naučne radove**, dok je jedan rad (1) ocijenjen kao stručni rad. Objavljeni naučni radovi u velikoj mjeri predstavljaju i rezultat međunarodne akademske i naučne saradnje kandidata sa istraživačima i institucijama u inozemstvu, nalaze se u publikacijama relevantnih naučnih institucija u Bosni i Hercegovini, Austriji, Srbiji, Crnoj Gori i Turskoj te su objavljeni na bosanskom, engleskom i turskom jeziku.

Radovi su objavljeni publikacijama koje su indeksirane u relevantnim naučnim bazama i/ili su izdati od renomiranih izdavača:

- Dva (2) izvorna naučna rada objavljena su u časopisu Godišnjak Pravnog fakulteta u Sarajevu koji se u međunarodnim referentnim bazama CSA Sociological Abstracts (Proquest), CSA Worldwide Political Science Abstracts (Proquest), a puni tekst je uključen u Central and East European Academic Source (EBSCOhost) i Law Journal Library (HeinOnline);
- Jedan (1) izvorni naučni rad predstavlja poglavlje u knjizi *Commercial Law in Southeastern Europe Legislation and Jurisdiction from Tanzimat Times until the Eve of the Great War*, koju izdaje renomirani izdavač Brill/Böhlau, a koja je indeksirana u bazama Proquest i EBSCO;
- Jedan (1) izvorni naučni rad objavljen je u časopisu Historijska traganja kojeg izdaje Institut za historiju Univerziteta u Sarajevu, a koji je indeksiran u CEEOL – Central and Eastern European Online Library i EBSCO bazama podataka;
- Jedan (1) izvorni naučni rad objavljen je u časopisu Harmonius Journal of Legal and Social Studies in South East Europe iz Beograda, a koji je indeksiran u Law Journal Library (HeinOnline);
- Jedan (1) izvorni naučni rad objavljen je u zborniku radova Zadužbine i fondacije u Crnoj Gori, kojeg je izdala Crnogorska akademija nauka i umjetnosti, kao najuglednija i najrelevantnija naučna institucija u Crnoj Gori;
- Dva (2) izvorna naučna rada (sa istovjetnim tekstom na dva različita jezika) objavljena su u zborniku radova koju izdaje Turska pravna akademija.
- Jedan (1) stručni rad je objavljen od Pravnog fakulteta Univerziteta u Sarajevu.

3. Objavljenju knjigu nakon izbora u akademsko zvanje docent

Kandidat je objavio jednu (1) knjigu. Radi se o monografiji u kojoj je autor predstavio rezultate svojih postdiplomskih (magistarskih), doktorskih i postdoktorskih istraživanja na temu recepcije Općeg građanskog zakonika u Bosni i Hercegovini. Djelo predstavlja pravno-historijskoj studiji, u koju su uključene metode i literature komparativnog prava, teorije prava i građanskog prava. Navedena monografija predstavlja univerzitetsko izdanje (Univerziteta u



Sarajevu – Pravnog fakulteta) i od akademske 2022/23. godine uvrštena u obaveznu i dopunsku literaturu za spremanje ispita na nastavnim predmetima prvog i drugog ciklusa studija na Pravnom fakultetu Univerziteta u Sarajevu.

4. Naučno-istraživački, nastavno-naučni i stručni projekti

Nakon izbora u akademsko zvanje docent, kandidat je **izradio tri (3) originalna projekta**, od kojih je jedan naučno-istraživačkog, a dva nastavno-naučnog sadržaja i karaktera. Svi navedeni projekti rezultirali su naučnom saradnjom različitih naučnih i drugih ustanova, kao i istraživača iz raznih naučnih/umjetničkih oblasti, a redovno su involvirali i učešće studenata i studentica Univerziteta u Sarajevu. Projekti su rezultirali:

- originalnim inovacijama u nastavnom procesu (projekat „Legal essentials“),
- naučnim doprinosom u rješavanju određenih stručnih pitanja u pravnoj/sudskoj praksi (projekat „Pravna sudbina sarajevskih vakufa“) i
- promocijom nauke i slobodnim pristupom vrijednoj izvornoj građi (projekat „Digitalna zbirka državnopravnih dokumenata BiH“).

Pored izrade navedenih projekata, kandidat je bio **učesnik u projektima** koje su organizirale druge relevantne naučne institucije u Bosni i Hercegovini i inostranstvu (**tri (3) projekta nakon izbora u akademsko zvanje docent i jedan (1) projekat prije izbora u akademsko zvanje docent**). Navedeni projekti provedeni su kroz međunarodna naučna savjetovanja, međunarodne naučne konferencije i okrugle stolove, uključuju višegodišnji naučno-istraživački rad kandidata, a rezultirali su ili će rezultirati objavom knjige u izdanju relevantnih izdavača i naučnih institucija u zemlji i inostranstvu.

5. Mentorstva

Kandidat je bio **mentor za šest (6) uspješno odbranih završnih radova** na drugom ciklusu (master) studija Pravnog fakulteta Univerziteta u Sarajevu. Pored toga, kandidat je bio i **član deset (10) komisija** za ocjenu i odbranu završnih radova na master studiju i član dvije **(2) komisije za ocjenu i odbranu doktorske disertacije** (broj se odnosi na realizirane odbrane doktorskih disertacija).

6. Nastavničke sposobnosti, doprinos razvoju naučne discipline i nastavnog procesa

Kandidat je od 2009. godine uključen u realizaciju nastave na Pravnom fakultetu Univerziteta u Sarajevu, i to na grupi predmeta koji pripadaju naučnoj oblasti Pravna historija. Od 2018. godine je, u svojstvu docenta, i odgovorni nastavnik na nastavnim predmetima iz oblasti pravne historije.

Kandidat je učestvovao u kreiranju nastavnih predmeta i sadržaja u okviru Katedre za pravnu historiju u komparativno pravo i aktivno je učestvovao u njihovoj reformi u okviru svih evaluacija i reformi studijskih planova i programa sva tri ciklusa studija na Pravnom fakultetu Univerziteta u Sarajevu.

Svoje nastavničke sposobnosti kandidat je unaprijedio i apsolviranjem odgovarajuće obuke (program „TRAIN“). Pored toga, kandidat je završio i dodatne obuke u inozemstvu, koje se odnose na podučavanje i istraživanje o pravu EU.



Kandidat je redovno ocjenjivan pozitivnim i visokim ocjenama u okviru redovnih evaluacija nastave i akademskog osoblja Pravnog fakulteta Univerziteta u Sarajevu te je dobio pohvale za rad u nastavi od anketiranih studenata i studentica.

Pored toga, kandidat je bio uključen i u vannastavne - tj. aktivnosti studentskih udruženja, za što su mu Udruženje studenata Pravnog fakulteta i Studentski parlament Univerziteta u Sarajevu izdali i posebne zahvalnice.

7. Naučne konferencije, seminari i okrugli stolovi

Kandidat je bio **idejni autor, organizator i učesnik pet (5) javnih manifestacija** u formi naučnih konferencija, panel diskusija, skupova i seminara te učesnik na ukupno **17 naučnih konferencija i okruglih stolova/seminara**, od kojih je većina rezultat međunarodne naučne saradnje.

8. Međunarodna naučna saradnja

Kandidat je ostvario bogatu međunarodnu naučnu/akademsku saradnju: proveo 4 istraživačka boravka u inostranstvu; učestvovao na 3 međunarodna naučna projekta; učestvovao na 15 međunarodnih naučnih skupova, konferencija i okruglih stolova; recenzirao naučne radove za strane naučne časopise, uključujući i *Journal of Islamic law* (Harvard Law School).

9. Stipendije, nagrade i priznanja

Kandidat je dobitnik ukupno **6 stipendija, nagrada i priznanja**, od kojih su dvije post-doktorske stipendije (neiskorištena stipendija Max Planck instituta za evropsku pravnu historiju i Vlade Štajerske), jedna stipendija za doktorska istraživanja (Austrijske agencije za akademsku razmjenu), jedna stipendija za diplomski studij i dvije nagrade (Nagrada Univerziteta u Sarajevu i Pravnog fakulteta).

10. Društveni i ostali angažmani

Pored radnog iskustva na Univerzitetu, kandidat je imao razne druge radne, akademske i stručne angažmane, od čega se izdvajaju angažman na projektu UN Women ureda u BiH, recenzentski angažman za naučne časopise, članstvo u Redakciji Godišnjaka Pravnog fakulteta u Sarajevu, angažman u svojstvu člana Komisije za izradu Prednacrt zakona o visokom obrazovanju Kantona Sarajevo, angažman u svojstvu supervizora Ureda za borbu protiv korupcije i osiguranje kvaliteta KS, angažman u *ad hoc* radne grupe za izradu Strategije za borbu protiv korupcije 2020-2024, osnivanje i članstvo u nevladinim organizacijama i dr.

Imajući u vidu sve navedene činjenice i konstatacije, Komisija jednoglasno zaključuje da kandidat dr. sc. Mehmed Bečić ispunjava sve uslove za izbor u akademsko zvanje vanredni profesor, koji su propisani Zakonom o visokom obrazovanju Kantona Sarajevo („Službene novine Kantona Sarajevo“, broj: 36/22). Imajući u vidu član 176. ZVO, Komisija jednoglasno zaključuje da kandidat ispunjava i sve uslove za izbor u akademsko zvanje vanredni profesor koji su propisani ranijim zakonom tj. Zakonom o visokom obrazovanju Kantona Sarajevo („Službene novine Kantona Sarajevo“, br.: 33/17, 35/20, 40/20 i 39/21).




Prema tome, Komisija jednoglasno zaključuje da kandidat dr. sc. Mehmed Bečić ispunjava **sve propisane uslove za izbor u akademsko zvanje vanredni profesor na naučnoj oblasti Pravna historija** te Nastavno-naučnom vijeću Pravnog fakulteta Univerziteta u Sarajevu upućuje

PRIJEDLOG

da se dr. sc. Mehmed Bečić izabere u akademsko zvanje vanrednog profesora na naučnoj oblasti Pravna historija na Univerzitetu u Sarajevu – Pravnom fakultetu.

KOMISIJA


Prof. dr. Zdravko Lučić


Profesor emeritus dr. sc. Enes Durmišević


Prof. dr. Željko Bartulović